

Daür a parti la diesime edizion di Start Cup, la competizion par students e ricercjadòrs de region

## Si cirin ideis gnovis par gnovis impresis

Start Cup, la competizion imprenditorial tra ideis inovativis, promovude dal 2003 de Universitàt di Udin e de Fondazione Casse di Sparagn di Udin e di Pordenon, al celebre i siei prins dis agns. La edizion 2013 di Start Cup Fvj, che e je organizade insiem cul ateneu triestin e ae Scuole superior di studis avanzâts di Trieste (Sissa), che a son sostignudis de Fondazione Cr di Trieste, e sarà cussi ancje une ocasion di fieste e di belanç de competizion che si è dade l'obietif di difondi la culture de inovazion dentri dal mont

academic e dal teritori e di tirà fûr dai scansei lis ideis dai inovadòrs, metintju inte condizion di frontâ in mût adât la fase di inviament di une imprese.

Nassude intal 2003 par promovî la sinergie fra imprese e ricercje universitarie, Start Cup e à puartât la Universitàt dal Friül ai vertiçs talians, concuistand par trê agns il podi dal Premi talian de Inovazion, par dopo cressi e diventâ un *business plan competition* bienâl, cjapant, tacant dal 2009, ancje chês altris dôs universitàt de region (Universitàt di Trieste e Sissa) e,

fintremai lis scuelis superioris, cu la nassite di Start Cup Young intal 2010. In dis agns Start Cup al à registrât cuasi un miâr di partecipantis, plui di 300 projets presentâts, 37 projets sul podi. Plui o mancul 15 des ideis premiadis a son diventadis pardabon impresis.

Vierte a dut il personal che al fâs part de universitàt, ai students, a esternis, ai fantats des scuelis superioris, la edizion 2013 de competizion e premiarà lis miôr ideis di imprese elaboradis sot forme di plan di afârs, che ur vignaran assegnâts

premis in bêçs e in servizis cualificâts avanzâts. Si pues iscrivisi fin a a vinaris ai 14 di Jugn travers [www.uniud.it/startcup](http://www.uniud.it/startcup).

Il concurs si articole in doi obietifs, regionâl e talian. Ai cuatri vincidòrs di Start Cup FVJ ur tocjarà un premi di 5 mil euros. I vincidòrs di Start Cup Friül - Vignesie Julie, che a vignaran proclamâts ai 27 di Setembar in ocasion de "Gnot dai Ricercjadòrs" a Udin, a varan la pussibilitât di partecipâ ae fase finâl dal Premi Nazional Inovazion (PNI), che si fasarà ai 30 di Otubar e ai 31 di Otubar a



Gjenue in ocasion dal Festival de Science. Tra lis novitàs di cheste edizion al è ancje il premi "Start Cup Udin Challenge Fvg", che al vignarà assegnât dal centri di ricercje e trasferiment tecnologic "Friül Inovazion" al grup che al savarà dâ une soluzion inovative a un probleme proponût di une imprese de region.